

17 JUN 2002

Parlimen-Islam

MALAYSIA NEGARA FUNDAMENTALIS ISLAM, KATA DR MAHATHIR

KUALA LUMPUR, 17 Jun (Bernama) -- Perdana Menteri, Datuk Seri Dr Mahathir Mohamad berkata Malaysia adalah sebuah negara Islam fundamentalis kerana dasarnya mematuhi ajaran yang menjadi asas agama Islam.

Dr Mahathir berkata semasa beliau melawat negara-negara Barat, beliau cuba menerangkan kepada mereka bahawa Malaysia bukan sebuah negara Islam yang sederhana, tetapi negara Islam fundamentalis.

"Bila saya katakan begitu, mereka terkejut kerana mereka menganggap bahawa fundamental adalah orang yang ganas dan membuat macam-macam perkara tidak baik. Bagi saya tidak.

"Kalau kita berpegang kepada fundamental Islam, kita tidak akan jadi buruk kerana Islam menyuruh kita berbaik-baik, bersaudara, bersatupadu buat benda yang baik, tidak salah kalau jadi islam fundamentalis," katanya semasa menjawab soalan tambahan daripada Datuk Seri Abdul Hadi Awang (PAS-Marang) pada persidangan Dewan Rakyat hari ini.

Menurutnya beliau juga pernah dilaporkan akhbar Barat sebagai Perdana Menteri Malaysia adalah seorang fundamentalis kira-kira 15 tahun dahulu dan beliau tidak pernah rasa malu mengakui sebagai seorang fundamentalis Islam.

Perdana Menteri berkata apabila diterangkan perkara itu barulah barat setuju bahawa selama ini penggunaan perkataan "fundamentalis" oleh mereka adalah tidak tepat.

Katanya, beliau gembira dapat membuat penjelasan kepada ramai pemimpin bukan Islam mengenai perkara itu kerana ramai daripada kalangan mereka yang tidak tahu mengenainya walaupun menunjukkan minat untuk mengetahui lebih mendalam mengenai Islam selepas serangan 11 Sept.

Semasa menjawab soalan tambahan Dr Tan Seng Giaw (DAP-Kepong), Dr Mahathir berkata Malaysia selama ini menjadi sebuah negara Islam yang bukan hanya diperakui oleh negara luar, malah dicontohi.

Beliau berkata tidak ada sebab bagi DAP merasa tertindas dengan sebarang kenyataan mengenai Malaysia sebagai sebuah negara Islam kerana selama ini perlembagaan negara (mengenai Islam) tidak pernah dipinda.

Ketika merujuk kepada cara penyelesaian masalah Palestin, Dr Mahathir berkata negara Barat perlu mengambil sikap "even handed" (saksama).

"Kita tidak kata mereka mesti memihak kepada Palestin, tidak. Kalau Israel buat benda yang jahat, kata jahat dan kalau orang Palestin buat jahat, kata dia jahat, tapi kita kena bagi timbang secara saksama.

"Kalau kita buat begitu dan kita hapuskan sebab-sebab orang Islam mengganas, insya-Allah, kalau keganasan tidak dapat dihapuskan sekali pun, ia akan dapat dikurangkan. Kita perlu ingat bahawa ada orang lain yang bukan Islam juga mengganas," katanya.

Beliau berkata Malaysia telah menggesa supaya Pertubuhan Bangsa-bangsa Bersatu (PBB) menghantar pasukan keselamatan antarabangsa untuk meleraikan kedua-dua pihak di samping menyokong cadangan damai yang diketengahkan oleh Putra Abdullah dari Arab Saudi bagi menamatkan konflik di rantau tersebut.

"Malangnya kita dapati PBB, mereka punyai kaki yang dibuat dari selut, tak ada pendirian. Bila nak hantar pasukan ke Jenin untuk melihat sama ada Israel mengganas atau tidak, Israel menentang. Kata kawan saya Kofi Anan, tak apa... dia tak bagi, kita tak pergi,

"Apa makna PBB. Kutip duit banyak, buat mesyuarat tiap-tiap tahun, buat pidato berapi-api tapi ini tak boleh selesai. Ini jadi masalah, dia nampak besar tapi tak ada keupayaan, semuanya bergantung kepada kuasa besar. Tidak ada keadilan sekarang ini di dalam dunia. Yang ada adalah 'might is right,'

siapa yang kuat dia berkuasa," katanya.

Ketika menjawab soalan Datuk Zulhasnan Rafique (BN-Wangsa Maju) Dr Mahathir berkata semasa beliau melawat Amerika Syarikat antara 13 dan 16 Mei lepas, beliau berusaha menjelaskan pendirian Malaysia bagi membetulkan salah tanggapan dunia barat terhadap Islam dan keganasan serta punca-punca yang membawa kepada keganasan.

Menurutnya beliau telah menerangkan bahawa keganasan di Palestin adalah disebabkan wilayah orang Palestin telah dirampas untuk mendirikan Israel dan kerana Israel menduduki wilayah Palestin secara haram.

"Yang menentang orang Israel bukanlah orang Islam semata-mata, tetapi juga orang Arab Kristian. Namun demikian penindasan ke atas orang Palestin yang majoriti beragama Islam menyebabkan orang Islam lain berasa marah. Mereka membalas dengan serangan berani mati kerana tidak ada jalan lain bagi mereka," katanya.

Dr Mahathir berkata Malaysia akan terus menyeru masyarakat antarabangsa supaya menggesa pihak Israel memberhentikan semua aktiviti ketenteraan dan berundur sepenuhnya dari kawasan Palestin yang diduduki.

Katanya Malaysia menyokong penuh pelaksanaan menyeluruh resolusi PBB yang meminta supaya Israel keluar dari Wilayah Palestin dan keseluruhan tanah Arab yang ditakluki semasa perang 1967.

-- BERNAMA
AZH AZH NMO